



Inatsisartunut ilaasortat Sivert K. Heilmann, ATASSUT aamma
Knud Kristiansen, ATASSUT

Akissuteqaat §37 nr. 2011-067

Inatsisartut suleriaasianni § 37 imm. 1 naapertorlugu tuttuuteqarneq pillugu apeqquteqarsimavusi. Apeqqut uanga akisussaaffeqarfinnut akisassanngortinneqarsimavoq.

Tulliuttoq pillugu apeqquteqarput:

Kujataani tuttu nuijuitsut amerliartupiluulersimasut, ilaatigullu killeqarfiup akuerisaasup avataanut pisalersimasut qanoq iliuseqarfigineqarniarpat?

Akissut:

Naalakkersuisut maluginiarnikuuvaat, tuttuutit nujuitsut sumiiffiup akuersissuteqarfiusup avataanut pisalersimasut ajornartorsiutigineqarmata, tamatumunnga ilaatigut pissutaasinnaapput, uumasut neriniarfiusussatut akuersissutigineqarsimasumut sanilliullugu amerlavallaalersimasimanerat, tassunga ilanngullugit nakkutigineqannginnerat misissuiffigineqartannginnerallu.

Tuttut akuersissutigineqarfiusimasup avataanut pisarnerat pinaveersaartinniarlugu, Naalakkersuisunit 2010-mi sumiiffik piniarfiusoq 11 kujammut annertusineqarsimavoq (takuuk nunap assinga ilanngussaq), taamaasilluni sumiiffik piniarfiusoq tuttuuteqartumut sumiiffimmu akuersissuteqarfigineqarsimasumut killeqarfeqalerluni.

Tuttut nalunaaqutserneqarsimanngitsut Nunalerineq pillugu Inatsisartut inatsisaanni nr. 5, 2. maj 1996-imeersumi § 13 imm. 3 naapertorlugu uumasutut nujuartartut isigineqarsinnaapput. Taamaattumik periarfissaqarpoq tuttu nalunaaqutserneqarsimanngitsut sumiiffiup akuersissuteqarfigineqarsimasup avataanut siaruarsimasut piniarneqarsinnaanerat tuttuunik nujuartanik piniarnermut malittarisassat atuuttuusut naapertorlugit.

Tuttuuteqarneq pillugu inatsisiliornermit atuuttumi arlalinnik pineqaatissiinissamut periarfissaqarpoq, tuttuutit nujuitsut sumiiffiup akuersissuteqarfigineqarsimasup iluanniiginnarnissaannik qularnaarinnittussanik. Ilanngullugu nalunaarutigineqarsinnaavoq Naalakkersuisunit maannakkorpiaq misissorneqarmata suliniutaasinnaasut, qularnaarinnittussat, siunissami tuttuuteqarluni ingerlatsinermit neriniarfiusussatut akuersissutiginnittarnermit naammassinniisnaasut piumasaqaatinillu allanik piumasaqarsinnaanerat, taakkununnga ilanngullugit uumasunik najugarisartakkami avataanniittunik nakkutilliinerit.

Inussiarnersumik inuulluaqqusillunga

15. mar 2011
Sagsnr. 2011-044794
Dok. Nr. 579844

Postboks 269
3900 Nuuk
Tlf. (+299) 34 50 00
Fax (+299) 32 47 04
E-mail: apnn@nаноq.gl
www.nanoq.gl

Ane Hansen